

四庫全書

集部

欽定四庫全書

集部

松隱集卷

十九至
二十一

詳校官庶吉士臣翁樹培

侍讀臣孫球覆勘

覆校官中書臣田尹衡

校對官助教臣汪錫魁

膳錄監生臣朱綬

欽定四庫全書

松隱集卷十九

宋曹勛撰

詩絕句

題扇

霏微梅雨暗林塘
潤逼琴絲草木香
捲箔鉤簾無一事
篆烟終日伴清涼

勢凌空碧小嵯峨
秀木成陰映斷橋
注意便為廬阜想
搖風最喜水芭蕉

薰風過雨到池臺綠蔭都無一點埃
傍架垂垂薇露重
糝枝已有橘花開

含笑殊名縹與緗就中暈紫最芬芳
纖枝小摘涓涓露

鼻觀須叅著肉香

此花須著肉
佩之益香

東風已過曉天清尚有飛來柳絮輕
捲起珠簾牕戶靜
一番新綠照人清

引睡文書堆棐几穿簾燕子揀梅梁
好風弄袖湖山近
隴畝搖春木杳香

碧沼波澄拂柳條坐來未覺水雲遙
輕輕風絮迷新漲
一轉新聲破寂寥

慣向青林與碧溪幽居竹石自相宜
種成滿眼花堆錦
開落如今總不知

草縈平碧柳舒金春色融融積漸深
巢燕高低尋畫棟
宿雲濃淡作輕陰

紅槃花上綠烟微風轉天香暖著衣
行遍四橋閑佇立
碧波時有綵鴛飛

瀾瀾水檻俯橫橋水面新荷影動搖時向青空飛白鷺
不妨翡翠立蘭苕

春去烟光綠已齊陰陰欄檻曉晴時新梢替盡殘芳靜
喜見餘花一兩枝

松篁交翠入幽深道院蕭閑每遣心一炷清香宜燕坐
數聲鐘磬有餘音

弄袖和風拂拂輕衆香迎面酒微醒涼尋小徑通幽處
花壓欄干竹一亭

小樓連苑碧山前
終日涼生枕簟邊
自是西湖秋更好
水光山色接長天

柳滿長堤綠滿池
藕花倚岸兩三枝
文鴛撲鹿驚飛起
一棹高荷艇子移

庭萱戢戢漏新春
竹外梅花冷帶雲
與客對牀風撼竹
一燈殊喜細論文

小軒風景畫圖寬
一再閑尋綠綺彈
雨著梨花春已老
烟沉芳草夢猶寒

老境惟期得醉歌何能浩蕩涉風波關山月白聞歸雁
風雨秋深想釣簑

殘春已去不堪招猶喜鶯聲破寂寥花片片飛風弄蝶
柳陰陰下水平橋

雨餘湖上數峯青湖水連天似鏡平一棹迎涼快襟袖
香從蘋末晚風生

暫脫塵埃污履絢白雲坐看起天隅荀梢鮮穉搖新翠
為作麾幢執萬夫

秋風天淨絕纖痕且喜新涼莫更論坐上捲簾人未醉
秋香滿院月黃昏

燕尾溪頭晚色分蜂腰山斷日斜曛半篙碧靜秋垂釣
一棹黃昏冷載雲

題人畫扇

雲餘蒲葦觀沙黃野水寒清鴈半翔柳下搖風雲漠漠

飛鳴應喜下瀟湘

雁

一川芳草接濃雲拂地垂楊帶雨昏蓑笠不堪牛背濕

迎風呼犢趁柴門

牛

寬圍綠野正華滋
放牧橫溪草軟時
跪乳從茲富原隰

尚羔先喜詠來思

羊

槲葉聲乾雪尚浮
馴和羣出映寒流
啼猿不在關山冷

相顧應無羽獵憂

麋

柳已如眉拂上林
細風吹動綠煙深
東君巧欲裝春色

更引黃鸝轉好音

風柳黃鸝

薰風欄檻送微涼
潔白南花玉蘂芳
倚徑一枝殊楚楚

任教蜂蝶繞清香

宋刊繡蝶

長沙筆墨妙山林植立如聽嘯月音岸櫺不妨俱遂性

一溪閑與照清深

獐獐

烟苞綠葉擁祥雲一種芳菲秀色新密蓓臨風凝重露

橫枝照眼覺濃春

來禽

野林物物適幽棲春引風高裂石時何處雙禽飛不定

靜宜翠竹亞寒枝

竹禽

慘慘江天散六花磷磷寒碧不藏砂扁舟蓑笠撐何去

應向溪頭問酒家

雪景

題俞槿畫八景

吳越山高紫翠重
浙江東下竦雙峯
峯前忽湧東西白

飛舞潮頭萬玉龍

浙江觀潮

千秋人去水雲空
只有荷花繞岸紅
寄語阿溪垂釣處

莫教閑却一絲風

鑑湖垂釣

蕭蕭木葉下西山
便覺蓴鱸興不閑
莫踏長虹千尺去

孤帆正在暮雲間

吳松秋遠

茲山泉石壓江西肩衲枯禪萬衆棲欲向南州理煙艇

香爐先望紫雲低

廬山霽色

秋濤初過靜魚龍海納斜陽萬頃紅待向焦山留夕月

一帆猶記挂西風

海門夕照

輕舟短棹下安流回首煙江望夕樓却記阿瞞當日事

灰飛煙滅只供愁

赤壁扁舟

上下天光一碧時白蘋紅蓼照晴暉漢陽樹遠江煙起

黃鶴樓空燕子歸

鄂渚晴光

清湘列岫擁煙霏不見靈均弔楚妃一帶僧園入脩綠
待看嶽麓雨晴時

滿湘雨過

題光武廟

隴蜀趨風泣向隅征途殊喜讀雙趺他年新載碑中語
百萬俱摧歷古無

故人高卧枕嚴溪香火紛紛俗不疲倘贊提封如帝業
也分百戶奉真祠

九州思漢定雄夫天下雄夫待一呼水亦復隨人意合

從來大度自同符

題倚江圖

有客登臨酒半酣道人仍為掃烟嵐瘦筇更約風塵上
驚飯老同彌勒龕

題焦幹釣雪圖

四山飛雪正漫漫蓑笠何人把釣竿六月披圖方執熱
風隨玉麈不勝寒

題建寧府分水嶺舖

三年閩海類飄萍
今近天樞第一星
雖是玉京猶萬里
江南山已望中青

題泉州延福寺壁

春深猶未試春衣
漠漠輕寒酒力微
堪笑楊花太輕薄
淡烟細雨不教肥

題釣臺

遐想先生後世名
常如山水四時青
因知功業成何事
歸美惟消犯帝星

題張太尉畫

一帶烟沙接冷雲
平林寂歷夕陽昏
輕舟急槳歸何處
應住山前黃葉村

題董亨道畫西湖

湖上秋山翠作堆
湖光千頃漾漣漪
曉雲貼水菰蒲冷
正是吳江楓落時

題信州月巖寺

不長凡花不長松
山藏月影紫雲中
巨靈巧鑿如規玉

借與神仙上桂宮

題岸老庵居

唯庵無住老禪人一坐中間遠世紛不討毗耶方丈飯
應思雨滿北山雲

題家園海棠小亭壁

萬點勻紅上海棠小亭無處着春光放教曉日滋新彩
要問東君學醉粧

題丁掾釣雪圖

連鰲妙手艤前灣
蓑笠琴書得自安
更待一輪清月上
靜看十頃玉光寒

題潮州黃岡驛

旱作顛風日日吹
冬來渾似麥秋時
土人尚畏生炎瘴
北客聞時淚可知

題顯恩寺

筍輿輶輶度林巒
投宿招提一枕寬
尚有山頭半峰雪
助成清夜五更寒

用前韻贈問丘民表

四寂無人雪在巒
喜君乘興酒腸寬
上方歸路踏梅影
霜月一庭天正寒

襄事畢次舊題韻

坎臨四正峙重巒
前直平田十頃寬
中有佳城揖東注
萬松深密障朝寒

題李次仲庵中

杖藜乘興出江頭
自挂青錢買小舟
祈問仙翁餐玉法

便風一日到嚴州

仲冬再到和前韻

江淮烽火照雲頭
買盡臨安去國舟
行見中興聖天子
一戎大定復神州

題雪景

雪滿羣山萬類沉
幽人閉戶寂無心
輕舟衝冷肯乘興
情與剡溪寒意深

四山吹雪灑滄浪
兩兩漁舟冷不妨
自是寒魚依密藻

江深岸迥謾鳴榔

題山景

林薄空濛未見花
縈紆一徑向溪斜
杖藜倚待舡中客
山崦同尋賣酒家

亂山蒼翠靄嵐光
採藥幽人鳳子香
路轉峰回茅舍靜
好尋絕頂訪僧房

題清虛庵

清虛指出翠微旁
便湧流泉溉一方
更拜璇題作神力

源源千古出甘涼

撥雲峰迴勢峒堯傑閣翬飛倚絳霄扶翊道風千載遇
昭回奎畫百神朝

松篁交映有無中行近仙扉一水東獨上上清三洞妙
寶章雲笈助真風

綠綺七詠

新厖翬飛萬馬還珠纓金埒綵旗間已看駉牝三千駿

更識君王十二閑

新馬棚

巧闢軒窓面面風坐收駿足玉關通渥洼汗血供龍馭

盡在憑欄拍顧中

閔駿

連滄觀下兩軍分金勒爭馳笑語溫綽撥未能防革棒

飛星時聽過毬門

習毬場

爐薰一炷北窓虛公幹歸來樂有餘挿架萬籤時諷味

孟光倚阮閱琴書

西軒

武庫森嚴馬政高寶鞍裝絡列周遭飯餘百役皆親董

出格爭先奉赭袍

後廳

頗聞公退靜清晨吏舍蕭然只數人豈比簿書程不識

是中得句更無塵

官舍蕭靜

皓鶴婆娑戢羽翰移巢忽自下雲間主人元是蓬山伯

特地飛來伴晝閑

自來鶴

梁潔夫幽居林宇靚深規畫幽邃不類貴第宛

然山林輒得七詠以廣命名之偉

伯鸞遠業列仙癯聊欲藏修六藝初肯費精神作無益

要回清節入詩書

悅禮

胃中丘壑上千尋卜宅喧塵了不侵
騰對直清君子瘦

滿簷寒碧是山林

谷堂

近天尺五闌車音此復關門自古
今盡却煩緣留靜照

破閑應賴有清琴

靜娛

堂依山麓淨風煙松竹窓虛小有
天汲水炷香供佛後

蒲團燕坐得安禪

本寂

低窓窄榻頗怡顏香繞衣襟丈
尺間一笑渠渠得三壽

要令風味似商山

橘中

平生端亮履清脩公退遽然得少休
栩栩尚忘飛蝶想

黑甜一枕更優游

思無邪

西疇築圃弭橐鞬
矍相佳游此比肩
自是序賓觀德處

固宜百發不虛弦

射圃

跋希遠細雨圖

牽風藻荇舞清漪
浪板無聲細雨時
小大自殊同隊樂
密圖勸學助韓詩

跋仰老小畫二軸

秀韻凌虛玉鍊顏蒼官偃亞碧琅玕只應中夕蕭騷月
相對一庭風露寒

蟾影寒升白玉京浩然天地一壺冰瘦筇肯倚瓊田立
應念瑤臺十二層

蔡提舉野望亭邀同賦

飯了從容人豈知一江風月入新詩登臨莫負野望處
更看冷雲堆浦時

送荔子與高觀察

磨銅碧海駕天風
吹落閩山荔子紅
弭渴文園剝明玉
急須寄上自嬉翁

送臘梅與曾砮父

紫煙破萼綴蜂房
薇露濃薰冉冉香
寄與赤城賢太守
要知和氣入風光

送柑酒與少瞻

小摘洞庭霜後實
旋筍真一甕頭春
雪中急欲林夫子
漫助詩人笑語新

送清隱純老住池陽杉山

冥冥細雨綠陰齊
湛湛長江客去時
別起眉毛欣應供
橫擔柳栗看來期

闕

送新酒糟蟹與賈之奇

小酌銀槽新撥醅帶糟郭索佐樽罍一時送上天台友
助對梅花人舉杯

陋巷何能有玉醅閑人正以鄙惟罍搗香節辣宜相送
似勝騎鯨月下杯

雪後寒濃酒未醅凍吟誰與酌金罍不憂穀下米炊玉
同放馬蹄銀作杯

新詩慰我勝浮醅宣待盃盤更舉罍但願車中無折齒
何憂舉案乏持杯

企詠公才綠漲醅我方破器不成壘詞源端並流三峽
薪火何能救一杯

以桃并酒餉賈之奇

家園有桃甕有酒取以先餉國正公定能百杯步兵飲
可助一枕羲皇風

得雨

喜乘一雨洗空濶便覺四山來夕陰飯了從容隨所往
追涼輕吹入疎襟

松隱集卷十九

欽定四庫全書

松隱集卷二十

宋曹勛撰

詩絕句

雜詩

方塘到影青天淨幽徑生苔綠蔭濃春去得閑觀物化
吹涼醒睡喜支筇

孤山不復訪林逋杖策東風踏碧蕪九里蒼雲經曉徑
四圍碧玉照清湖

雲際翻風斷雁斜
城陰槃暮噪棲鴉
春容落景寒猶嫩
望盡遙天數縷霞

遠水兼天冷暮雲
驚風脫葉靜逾聞
蒲團宴坐都無事
只有山鑪供夕熏

幽棲真在赤城隈
桂月蘿雲冷斗臺
猿鶴定能知我意
移文未怨晚歸來

景陽未下水雲鄉
梅影搖寒月一窓
欹枕夢能歸故隱
滿帆煙雨渡濤江

春事匆匆祇可驚
暄和喜試曉衣輕
梅花爛熳渾如雪
只恐風多墮玉英

欣欣花木遞香紅
雲散天容靜碧空
恰是韶華濃似酒
柳絲澹蕩杏花風

從來甚愛水雲居
投老安閑且自如
瀹茗焚香方外友
白灰紅火養丹爐

臘後暄和若夏初
梅花催暖不容踈
從來準擬連旬賞
數日能忙雪不如

曉天梅潤喜追涼湖上夷猶興自長清耳要聞蒲稗雨
拏舟深入水雲鄉

清暑堂深日景遲牀頭書策夢回時小欄閑倚薰風晚
一點紅榴綠萬枝

連旬梅雨暗人家甚阻支筇一徑斜待得晴明蔭新綠
追涼風帽側烏紗

此生擾擾事無窮脫得閑身石火中聊種柴桑三徑菊
未輸嚴瀨一絲風

危亭欄檻倚江干
飯了登臨得暫閑
林木巧隨高下路
山容都在有無間

西窓忽見弄微明
甚喜江湖作晚晴
不憚雲霄遺暑濕
且無聒耳瀉簷聲

喜晴示
同舍

綠暗紅稀迷處所
梅黃雨細半陰晴
小軒坐久無餘事
喜聽黃鸝一兩聲

飛去鶯兒黃一點
壓低梅子綠團枝
鈎窓捲箔涼生坐
但覺新陰轉影遲

柳浪收晴水拍天湖邊宮殿影相連
悠揚笛韻惟愁徹
欸乃漁歌何處舩

柑花開密玉璘珣香轉薰風滿坐聞
摘得一枝叅鼻觀
不妨終夕醒餘醺

佛頭山下雨隨風倒海翻江一餉中
徙倚欄干便晴霽
湖光渺渺夕陽紅

一山孤秀隱溪雲溪影涵光隔世紛
松竹徑深涼意透
衣巾不覺午風薰

道人身在水雲鄉
誦罷楞伽日乍長
滿坐好風驅熱惱
一庭濃綠作清涼

輕雷隱隱初驚夢
小雨踈踈巧潤花
正是暄和好春色
常將詩酒賞年華

款段揚鞭過雨村
沙平步穩轉山根
好花一簇牆頭見
深院誰家尚掩門

浙浙西風入小樓
樓中聽徹玉笙秋
不妨青竹搖殘夢
甚怯新涼攪客愁

澹煙疎雨冷瑤林一水涓涓淨不深
照影自憐逼搖落歸塗未就更闌心

紹興癸丑上巳日

連歲邊氓不荷戈今年禊飲喜如何
中興樂事雖無象甲子先同晉永和

枕上聞杜宇

催曉鐘殘景氣清杜鵑聲裏夢魂驚
山林廣袤不知樂猶作不如歸去聲

曉聞禽

一枕山城曉夢驚
子規啼破月斜明
只應知我勸游苦
故作不如歸去聲

初夏松隱看雨

細細南薰氣已深
午來庭戶作煩襟
雨雲不向西山出
只在青天忽變陰

松隱雨過

坐見青天變黑雲
雨來海上似翻盆
千巖萬壑方噴薄

寂歷斜陽已掛門

雲籠赫日藏陽燄人向紅塵困暑風山驛醒心何處是
幅巾蕭散夢魂中

斷梅

暑雨連朝困鬱蒸淖深蛙蚓上堦行晚雲翻海忽雷震
農說斷梅明日晴

寄跡天台見未曾夏間休市絕蝦脰瓜茄只有園中菜
淡素渾如寺裏僧

積雨連宵氣象清曉來日色頓分明更無一片閑雲采
萬里青天萬里晴

聚景園看荷花

四山收盡一天雲水色天光冷照人面面荷花供眼界
頓如身不在凡塵

途中七夕

道塗行役費光陰節物還撩一寸心百尺烟壇上星斗
笑看兒女競穿針

秋日有作

秋暑強如三伏時
午雲不動漲炎暉
晚來忽作一霎雨
喜有新涼入客衣

未有鴉啼露氣清
西南殘月半規明
無言步繞闌干曲
景與老懷空自驚

丹桂再開對酒

丹桂何堪急雨催
清香不肯逐蒿萊
却應念我經年待
借得餘霞為再開

浙西川禾以高竹又在水田中望之如羣駝

浙西純種晚秋禾更得明年雨不多且刈且歌豐歲甚
平洋彌望列明駝

幕中冬至書事

書雲節物動冠裳愧我從軍樂事妨聽得隣家響絲竹
壯懷無處不淒涼

夜坐偶成

雪後清寒硯已冰地爐火冷撥疎星夜深何物閑相伴

惟有紗籠一點燈

代簡國清老惠梅

梅從雲塢冷搖春玉雪浮香不着塵
愚谷斬新肯拈出一時全露法王身

憶台城之東十里梅

東城十里冷雲低
照眼傳香總是梅
冷落京塵誰晤語
關河千里獨裴回

問西湖梅

山肋梅花秀色新不堪寒雨浥清塵故應倒影澄瀾碧
濕玉吹香爛熳春

訪印老宿寺中值雪

白項鴉兒啼遠林怪來新冷透重衾僮奴竊語若為去
雪滿前山數寸深

與印老同訪天封老至夕忘歸

斜風吹雪冷征衣來見長眉老阿師為我曉開銀色界
笑談寧復問歸期

光孝病中聞予與印在天封亦冒雪見過

老病維摩方丈開天風破冷舞瓊瑰滿山皓色作和氣
知是道人衝雪來

代廣漕劉元舉謝趙相茶

龍焙黃封錫有功謹嚴正味德相同便知鈞播無求備
更借扶南兩腋風

方珪圓璧貢春前上相分盼自九天何止芳薌禦魑魅
要知紅日在斜川

謝錢處和惠握青瓜

暑氣侵凌坐起難
忽盼一握滿雕盤
起嘗頓覺煩蒸去
熨齒甘香碧玉寒

孫倅書尾附二詩

已作驚禽不擇柯
異鄉那復困風波
別來莫訝書悽惻
憂患艱難我最多

南徐作別抵閩鄉
三見春風換衆芳
若對舊游知識問
為言羈旅鬢成霜

小詩遺人謁邑令

林生牢落歎萍蓬
詞采飄飄甌屢空
聞道河陽花滿縣
欲從大手借春風

書王應夫題記後

每逢佳處見新詩
語妙春紅繞萬枝
我亦欲尋潮揭去
擬求握手話風期

南園有懷

江上春陰一棹閑
濕雲遮袖有無間
輕莎細雨未歸得

且看重重疊疊山

即事

殘冬梅玉已全開
明日新陽應候來
但喜癡兒欣節物
又聞殘酒滴壚灰

跋仲營子母馬

苜蓿枯時霜雪深
峻嶒瘦骨病侵尋
高蹄豈復騰驤意
眇目終存舐犢心

老駒雖病氣猶雄
垂耳應憐一尾風
春草明年沙漠路

奔塵絕足許誰同

和雙溪

從來野性自由身
正欲山行不亂羣
小築與君今不遠
松蘿只隔一山雲

戢戢青林萬籜龍
滿提煩覬躡
嚙翁只宜放出長梢去
抹月披雲紫翠中

欲往雙溪積有年
病身須是履晴川
梅霏正作侵衣冷
餘暖猶思糞火邊

糞火懶
瑣事也

謝雙溪見招

入夏山中樂有餘
梅風淡淡雨踈踈
塵勞久欲雙溪去
正類饑鷹待一呼

謝崇上人惠新茶

春入閩溪草木香
靈芽一夕一絲長
上人自是春風手
分與閑人齒頰芳

夏日偶成

梅溽霏微晝景長
竹吹清潤着衣裳
未妨燕坐連宵雨

且對澄心一炷香

且欣久雨得新晴
水面荷香入坐清
盡日水塘無一事
夏鶯恰恰轉新聲

田田秧稻半青黃
比屋人家煮繭香
新綠侵人襟袖爽
滿川烟水助清涼

雨濕雲容廓太清
池邊向晚喜閑行
回溪曲港烟波綠
已有荷花照眼明

晴湖捲箔挂窓時
三面山光翠靄低
漸放扁舟波浩蕩

喜看臺榭水東西

雨過梅黃五月天
風林密處漸聞蟬
直須破浪銷煩暑
一頃波光一棹烟

天台書事

南窓面日北窓寒
終日南牕體甚安
向道老來惟倦坐
看銷一縷篆烟殘

老來少睡怕房櫳
欲睡還休被屢烘
半夜披衣還打坐
耳邊聽盡兩山鐘

人情人事撥來無惟有親知意不踈數幅沓來還一幅
寒溫而已作回書

連雨催寒黃着苔紛然枯葉擁閑堦了無春意到梅萼
只有瑞香先臘開

清曉鴉啼睡夢間喜聞飛雪滿前山攬衣忙作披衣意
不問輕寒且凭欄

小圃都無花木名只栽松竹養餘清時時風向邊頭過
喜聽松聲又竹聲

綠陰侵坐午窓明
几案書繁倦思生
喜拆緘題新卷帙
故人惠我見高情

終日飛霏下遠空
冷回簾幕却東風
瑞香滿檻深遮映
怕損亭亭紫錦籠

水雲深處是吾家
飯有胡麻飲有茶
鐺裏未能炊一粟
山頭學得種三花

雲出雲歸山未靜
潮生潮落海非閑
豈如此老猶強健
一挂冠裳便掩關

束髮名場歷百艱荷恩早許出清班未能脫跡塵埃外
已愛著身泉石間

香火尋盟欲過門相迎道地盡先論路從舍北清溪曲
家在縣東黃葉村

飯了從容古寺前杖藜閑倚聽清泉因看隣僧一則話
攪却老夫中夜眠

觀馬院洗馬

相靡相躋性不同金環壓轡照晴空晚來洗罷游韁緩

喜聽驕嘶岸柳風

春晚

春事紛來似到家
恨無仙術駐年華
一聲雷送曉來雨
百和香凝欄裏花

滿城新綠障清塵
景物回環付大鈞
無奈垂楊千萬結
織成幽恨付殘春

楊柳密栽烟外縷
丁香嬌結雨中愁
細推物理何能理
且作東風爛熳游

新荷貼水翠田田綠滿花梢午影圓飯了從容春事靜
螭頭閑掬水濺濺

春過花飛不可尋空餘新葉翠光深爐香裊裊軒窗靜
時有珍禽轉好音

泛湖次柳洲

一棹西湖意不闌解頤風約水雲寒瀾瀾細浪蓬邊去
疊疊青山枕上看

淨舍乘閑一葦航入門松竹獻清涼倚欄澄碧龜魚樂

照眼荷花風露香

試筆偶書

家住天台水石村
四圍都是給孤園
有時桐柏庵中醉
醉後歌歡更自翻

小雨看海棠

浣花紅綠四回環
何事輕陰作嫩寒
應是化工知勝處
海棠宜向雨中看

雨作

千峯注雨作微涼寶殿留陰忽夕陽入夏暄寒曾莫測
雷聲猶震碧雲傍

倒海傾潮翻白雨鉤窓捲箔度清風江山一餉驚雷靜
已有閑雲行碧空

題應之二扇

紡車補網住溪頭草木蕭蕭隱顯秋賈客數聲何處櫓
水雲應却羨漁舟

一帶晴林散曉鴉山邊理棹釣雲沙有人策蹇春風裏

應向溪頭問酒家

題幸蜀圖

曾讀開元天寶間四時風月不教閑
常聯玉轡游清夜
豈意崎嶇蜀道難

松隱集卷二十

欽定四庫全書

松隱集卷二十一

宋曹勛撰

詩五言

山居雜詩

種杏三年實種桃一載花花實固可樂為農本桑麻功
成不占地改植常可誇要是農須學作畧自一家
隔歲種成麥起麥秧稻田晚禾亦云竟冬菜碧相連收
割不閑手壠畝無空阡家蓄千指客始知常有年

孟夏物物茂瓜瓠先置架闕

纏挂白

花亦已出青實旋造化會喜園枯時闕筋不增價

蒸沙以為城冶鐵用作限未伸彼利害先為已憂患家事席未暖基址已永歎在德不在險推類仁者諫

吾年今七十非杖或能行食罷散步武欲與跛鱉爭皮裏氣不充骨中髓不生安能勉筋力笑傲雲霞輕

伏日更酷暑當午劇炎烈火雲凝不動勢欲闕歲熱天

公蘓赤子雨隨震霆發一掃回清涼庭筠助騷屑

除地台山麓稍葺五畝宅松竹互偃亞雲山若阡陌子
舍念我老文餘躬幹役欣欣歸來樂樂豈一朝夕

墻裏種桃杏新春亦已花墻外繞扶疎綠蔭皆桑麻今
年風雨時日見田稻嘉長併瀉黃湯且餉田畯茶

清曉看田去乘露衣襟涼已有耘夫出揖我喜非常為
言苗正好喜顏笑亦長雖有吏在門視苗端可償

松根有至藥琥珀與茯苓琥珀未易致茯苓闕宜精製
與鞠塵細色如截肪并一一伴朝粥地黃安可烹

松色蔭人居松力治人病丹砂含其滋復可延性命幽
居繞蒼髯不畏夏日盛風來聽笙竽便有華胥興

卜居得幽勝景物無升沉峯巒環郭松竹排園林時
時破寂寥翛翛賴鳴禽於焉自有得天籟皆餘音

竭去天台居邑有萬戶酒一出嘗十家已覺醉屢肘留
連多好事方圓煩訂鬪約趁黃昏歸不知月挂柳

年來心目昏稍息文字業曉擁台山雲時讀修楔帖稚
子來捋鬚幼孫每持鑷晚來微雨休幽徑無不涉

三伏暑可畏貧富方共之雨忽兼飄風涼與清氣隨一
餉滌炎暵萬里失蒸炊大哉天地德好生常所施

七月正流火晚飯淨刹中稍脫蒸鬱苦頓覺心境空放
意覽翠岫徐行迎好風得來喜不徹闕賜皆天公

棄官了無事飯餘心境空清琴或數弄濁酒時一中人
生苦不閑得閑須從容閉門適吾樂三籟皆同功

今年已斷梅七月雨益大苗雖不厭雨灌恐有餘既禾
梗正柔嫩水滿舞澎湃其間田高低于焉有畏愛

北風忽捲熱山頂雲已馳日影未容歛雨脚俄驟垂一
向得涼吹四山橫脩眉暄寒本兩陸莫能測密移
今歲立秋早便覺驅探湯雖有正午熱已覺中夜涼麻
豆率房角早禾亦上場吾心喜可知紀實藏詩章

晚家台山下雲水同一鄉人事講鄰曲雞黍期相當秋
風起木杪涼氣吹衣裳東家喜見招社甕開新嘗

道人談長生禪子論寂滅二子互出奇生滅孰判別吾
儕守黃卷生理知猶劣惟當一以貫無問亦無說

前岩有蘭若委徑宜細履未能望宰堵屢復涉清泚路
紆疲脚力僧老識茶味策杖趁栖鴉斜陽在林際

客惠雙井芽千里冒寒暍品格自高勝香味兩奇絕小
小猷溪磨團團掌中月揮肘喜旋之紛汨看落雪

東岡老道友招我閱子孫大兒教以孝小兒撫以溫舉
觴意未暢已復月挂昏興言還吾廬更待它日論

真隱古招提長林如磔蝟雖有羣山峰所欠一支水草
木乏秀潤巖竇燥肌理安能借僧錫卓處泉湧沸

士不遠千里訪我村落中話舊語益密論交顏不紅酒
盞乏供給近製相延容白飯與青芻且餉驢與僮

栽竹勿傍牆種蕉莫近砌頃之根蔓延寢乃壞階阼扶疎宛成趣茂密相映蔽操刀時遣獠洗削去翦翳

朝來天無風秋暘劇炎銳當年屏翳動松竹發清吹風
豈憐我老飄蕭翔異氣冷然濯煩襟蘓息殆天意

平生文字飲真積力已久溫故忽若醉卯飲不待酒昏
然亟步武快哉繞陋水濶夕陽紅雨餘羣山秀

閑時謁墳山小築真隱麓怪來少清景頗似闕脩竹荷
鋤斲雲烟移種扶疏亭亭纔數根一掃羣樸檄

閩浙風土異九日未見菊豐枝闕秀色細蓓淒已綠當
樽折野藥氣味亦長觸詎知三徑中采采不一足

闕

欽定四庫全書

卷二十一

偶讀禪門禮老蹟存清規魚鼓鐘磬間細行無威儀能
居三板頭可當一住持破衲受用薄後來有不知

瑞香本廬阜瑞昌最為冠以此得瑞名昧者強臆斷種
法避寒暑錦籠不足纂欲披紫雲裘時分建溪椀

天地有大德好生洽民心炎雲漲毒暑此風散重陰欲
驅采旬熱忽作三日霖人物荷造化喜歸田畝深

頃職古器事三代考纖悉閎異必夏商形模且朴質其間盛歟識鼓文儼周室固知文武隆牧敦當第一

蒲桃天下冠太原與全邠邠故近西涼種植紛士民豈但馬乳堆殆若荔子春為膏為酒醴香味有此珍

調羹商相業粉額漢宮粧寄遠與却月六朝用彌彰犯寒清而潔騷經何獨忘撫卷懷靈均靈均亦沉湘

蓋屋不在華所欲庇風雨種花品無繁四時看開處指喻多非約日涉乃成趣吾年能幾日景物亦漫與

海棠盛西蜀豪壓春風塗三月浣花溪游人鄙金珠少
陵時居灑詩史切太虛獨不被品藻此理端何如

道德五千言屢讀殊隱奧頗能分句法已自到微妙治
國與脩身篇篇言上道講解七十家識者自知要

僧相同剷除其門則異竇律儀尚講論枯禪則烏有悟
去此大魁窮說則學究與語判此科是非免紛糅

閑居養僮僕衣食必鮮美小則愛睡眠大者趨博戲不
然言疾病莫能承付委長須與赤脚昔人誠有理

莫恠游春頻只被老逼身念此樂天語誠哉辭甚真遵
行我不勸治具汝勿嗔持炬接迎我村醉歌冠巾

三春羣卉盛在花茂與殘好花正穠麗不作十日看
蓓嫩便須賞開時惟可歎繼自喜新綠吾心常並觀

煖室宿火銷緼袍良獨暖病身怯夜永老懷苦晝短棲
鳥驚簷頭朝日上窓眼未問粥面花地黃酒須滿

侵晨盥櫛起爽氣隨涼颭曳杖踏露草不覺路已遙水
清出沙蒲烟白橫山腰致爽列羣岫不待西山招

從昔漫浪心家居意不適晨朝香火餘飯了辨游歷或
訪僧掇齋或隱者對奕歸來任侵燈龍吟噴霜笛

前村有經社香火訊屢通携朋閒步往老人顏有童一
杯苦澁茗滿塘蒲稗風笑顧紙上佛何時供渠儂

平生不能棋遇棋亦輒喜從來號萬戶知生不救死多
見國手說得先乃妙理更有末後着此着知者幾

不持月三長不奉八關戒久素則生疾多肉亦思菜齒
決今莫遂啜汁老所快終當屏去葷君山得自在

江海吹天風飛舞散千壠橫斜任所適光麗世非種險
穢已平治屋背欲泓湧年豐此兆之有秋高可拱

旬日扣玉京所見如夙昔紅雲隱碧洞清溪映白石臨
流坐且久浩氣洞胸臆溪深竟難涉跼蹐撫蒼壁

古鐵如鈎戟歲久鋼斷綻久為土氣蝕皆成豌豆瀑銖
兩每不多積之可精煉為劍或為刀花賓劣于滇

平昔喜黿舉未易自摧墮功名邂逅來求則成大過壯
年不艱苦老即困寒餓消長理或然要知非力可

造化致有生旋亦致凋瘁草木方疑疑枝葉忽靡靡初
發白雨滌接以赤日熾末為颶風吹從是即委翳

早年困俘囚驚痛失方寸居常雖勉勉臨事輒悶悶作
字每誤墨裁詩或失韻老來疾益侵荅然誰可論

半夜秋風高便覺殘暑退一涼精神醒終夕枕簟媿我
老念病役生病為形贅永懷忘形友寒暑孰能累

雞冠與鳳仙早種近階砌夏秋無花時類能作幽致雞
色惟青紫鳳藥雜紅翠來年不待種罅隙自苗裔

台山邑萬戶戶以酒為天不憚甌生塵所願酒如泉多
疾自麴蘖致天非天年因思禁酒法積粟民沛然

萬花烘天容粉色騰雲氣花雲覆臺榭疑若天亦醉杯
盤多歡賞供帳亦明麗游人侵宵歸風雨恐踵至

赤城玉京天冠簡奉香火一旦僧有之道容易佛坐忽
為道復得瞿曇加巾裏屢改神不聞二家自人我

先生義皇上與物同逶迤道伴雜然至開情示之希蒲
團茶味足明窓情話遲一室多入靜相見亦何時

詩松須殘臘栽花宜早春移竹日隨月種麻月及辰旺
方八卦定農詩七月陳物性無不然農業宜斤斤

山間氣候晚初冬菊英回定俟開爐集始送泛菊杯漸
列衆色異不殊東籬栽冷雨與寒烟深惜易塵埃

台山穴三獸樵者不得薪忽是食人虎便有射虎人善

惡必對待禍福常相隣采月寢三皮居山聊一欣
時有三虎

出入澗下一月
間獵人盡得之

春雨要如膏發生物已拆霖霖則易耨浸漬乃損麥連

旬不見日過社麻亦阨再拜祈開晴民食庶可得
蓬蓽久不居乍歸欣故情落葉聚蛛網殘莎鬧蛩聲迹
與朝市遠夢隨風月清從此眠食間蕭散安餘生

八月河漢近涼蟾輝太清窓戶紗已薄草木風有聲所
喜暑云退不憚歲徂征招客對晚色酒與月同傾

村落闢幽居深靜頗得趣白雲棲簷棟嵐光照牕戶往
還得隱逸談笑皆舊故不畏歸途遙家家響機杼

手種亭下松偃蓋出雲外攀條喜脩榦為我發清吹曉

庭風瑟縮夜月金鎖碎種久方來歸對之顏有愧

寓居溪陰剎未暇理歸棹遮眼闕文史借書得探討卷
舒白虎通涵泳青龍鈔賢哉絕世書欣然慰幽抱

吾年已七十眠早起不宴勸甚就宵枕卧久思永旦雖
無文字勞漸絕人事歎收其放心爾戒得尤所贊

得閑一何樂佳處先徜徉每扣隱逸士屢過清靜坊地
僻干戈遠年豐禾稻香訪我亦何所南澗與東岡

架屋集匠氏斲石竅可恤相石千仞端塹山方得出疲

形困輦置巧硤較絲忽所直等衆人人可不擇術

陳梨甘若飴雪梨脆如水二物浙左右大顆擅甘脆秋
熱兼宿酒啗之手不置雖非鳳濁鵝惠子亦多矣

台蘿甘擅名油葱茰枯腊及居台山下生致出岩隙丁
頭形磷磷雞股香幕幕清對雲水客葷素得共食

休退居遠邑頓喜人事疎飯籬自不足日記無可書惟
對楮先生復接松大夫溪友留白魚斲睡驚長須

晨粥山中行落葉響步武委曲訪隱逸清談銷百慮老

湯淪苦茗宿火煨山芋却照夕陽歸家人不知處


初意得閑適處處期登臨豈謂病見拘未能攄靈衿小
滯廣莫願恐辜雲水心強半人事爾無令成侵尋

臨老看草聖作字意少快居然落筆際點畫反留礙早
意亦易事懷抱殊不介茲來每把玩徒復一歎慨

歲華念將晚寒色慘中抱昔年困壑鹽撥灰吟苦調老
來適其適所樂在燕笑招賓共一醉圍爐不妨小

北風號枯桑濃寒堅夜凍關河鳥過少雪意曉來重陌

上未霑塵山中已成壠
雖雖南去雁袖手徒目送



松隱集卷二十一

欽定四庫全書

集部

松隱集卷二十一
五

詳校官庶吉士臣翁樹培

侍讀臣孫球覆勘

覆校官中書臣田尹衡

校對官助教臣汪錫魁

謄錄監生臣朱紱

欽定四庫全書

松隱集卷二十二

宋 曹勛 撰

詩

五言

山居雜詩

我生不僥福始終躬純臣雖更齊楚偽常鄣西風塵耳
順早引年掛冠踰八春甘與田畯游遂予胸次真

農人作田務耘耔者最辛苦胼胝伏泥塗拔莠連茹取所
拔隨已多悉釀所伏處惟覲禾稻肥豈問正炎暑

地水與火風四大各一性和合乃養形損增則成病圓
覺著于品岐伯峻其證君子知其言窮理宜至命

山中四序景巧供晨夕間茶甌不少輟詩魔常畏閑生
計付風雨年華寄毛顏支筇正獨立栖禽相與還

歸為田舍翁不作無復理耕鑿頃畝地遠近先視水溝
塍欲利達農具無委靡高田下田事得馬失馬爾

小圃藝花竹春末已繁秀土脉得鋤斫枝葉易秀茂久
以告老病未免閑圭竇相忘無芥蒂一二約親舊

古斗喜妙供溪蓀種勻抽蘸水浮翠媚絡石駢栗皺疑
疑巧凝綠梢梢眇含秋相對几案間蕭然無與儔

閒裏心情拙還知興自嘉飢鴉時立檻野蝶自尋花客
至聊從容僧來不厭茶晚烟時竚立列岫映餘霞

人生行樂爾行樂則心閑心既無所用和氣滋客顏衛
生有此妙餘事皆可刪若益兼忘理敢告知識間

招客圖客歡不圖能病客既醉失匕筋吐茵墮巾幘何
堪款曲意貽念風月夕拂旦往問訊慙恨見顏色

春雪翳重霄寒雨連日夜不輟獸炭熾甚恐庭花謝疎
簾莫禦冷爐焚屢成炮寒食數日間春事求諸野

吾年踰七十真欲願春逢豈謂上元過適丁多雨時韶

華荏苒半清明旦夕期流鶯與蜂蝶冷落殊未知

戊子年二

月廿
清明

客寄輦轂下馳心田畝間君恩重山嶽臣節殊安閑雖
幸米鹽足其如塵土顏終負告歸罪判然誠獨難

老去情懷懶脩然只此翁閑窓千里月修竹一簾風事

與孤雁遠心將止水同故人如問訊癡坐正觀空

寂歷秋風晚閑庭落葉深天高晴日澹山淨暮烟沉疾
病無時已年華有底侵兩行南去雁一片北歸心

北歸了無日先墜掃何時愁與燕鴻遠心同楚客悲寒
蟬咽敗柳幽鷺來清池誰與話舊事淚蘚空在衣

連日山村雨牛羊都在欄低田漬積水臥穗鋪新寒氣
逼琴絲潤香傳岩桂丹天光惜壠畝應放月團團

秋色遂將半游雲時淡濃水光影擺掣秀色增芙蓉斲

地種三徑鉤窓來五峰新晴何以卜一意聽晨鐘
冷趁西風便雲趨南國深相春聞野唱漂絮擊溪砧小
立遲殘焰閑愁倦寸心新亭有耆舊應共惜花陰

白日忽若暮北風天正寒濃陰欲釀雪雲侶商量間羣
兒競喜躍婢子爭仰看命席撥甌碧取醉期盡歡

淒風入林薄曛日升山遲槿花落因雨菊英開映籬身
老每倦客目昏猶喜詩所欣水雲念得赴猿鶴期

晨起冒清露笋輿出城闌原野回舊色花柳搖新春卷

言山林性常與魚鳥隣怡然適襟抱自謂羲皇民

我本汝潁士老隱天台山一瓢顧粗足三謁無厚顏身
與樵牧遠居眇林壑間不為物事役常對風日閑

平生江海性俗冗不到眼偶然牽祿養遂復事篇簡所
愧道益遠所喜性習懶末路終此惠尤得養樗散

稍稍岸上柳粼粼岸下波晴雲幕遠岫東風扇微和去
冬有耕植連春無干戈田畯知此意種秫應更多

高原收菽麥下田插禾秧田頭與地尾一一意所量躬

耕辨好怯擇種均豐荒所以終歲間食米不及糠

大麥未救飢小麥漸擢芒此時農夫嘆政阻接青黃多
畏頻雨澤只欲暄晴光農安吾亦安朝夕祈蒼蒼

堂堂春將去好花如欸留荼蘼蔓層雪芍藥歌重樓金
沙挿架富蕙香轉林幽我欲助送之飛絮漫天愁

曉來浩露出細履欣欣然穞麥漾輕浪芳草迷平川無
邊綠成幄團飛柳皆綿老翁指謂我漸熟高低田

西山隱道室山光鑠蔥蒨松竹意可揖芳潤欲入饌扳

携一二友香火共昏旦天台坐忘身笑領吾所眷

日鑄得新茗色味建水空未論七盃足先借兩腋風烹
在擊拂外香泛齒頰中若論破睡魔自可書元功

行都老故舊見贈新歷日快哉得過目遽然若有失已
病嗟再歲漸老念弱質歎餘落塵尾非言付搖膝

冰壺凍欲裂霜風凌雪屋牛鬪攪夕眠餅筌不成曲平
生湖海心弗受車轅促晨興且採梅不憚肌生粟

閑中每自得閑意非陸沉蟻穴漫說夢鷗盟誰更尋一

年記好處萬緣隨夙心即以洗其勞清月升層林

幽居歲屢換豪舉欲誰作閑情寡賦詠舊句漫筆削草
茅晦小隱筍蕨供大嚼不時有佳處悠然動春酌

塵境得閑適塵事從如麻且發蟹眼湯一試鷹爪芽蕭
蕭衲帔冷冷心境嘉坐久若為侶清月上梅花

小庵築桐柏宛在艮山位數峯直遠目一水繞右地門
徑連主山松篁接空翠貴客下北闕喜話卜隣計

平生有知舊相望頃以疎卧念十日雨誰寄一行書景

已來白雁詩漫如黃初不忘剡溪棹且策雪中驢

下邑常寂寞細履寒溪頭魚鰕腥斷岸橘柚明晚秋山
色儼晴碧溪光泛澄流相思故人遠應過回雁洲

秋色不勝悲濃霜寒入衣蔬畦俦小橘茆簷曝晴暉人
去歌酒歇雁來音信稀好客招不來楓葉伴愁飛

雨急怨春晚花殘獨稔香燕巢方穩密蝶翅覺淒涼引
睡謾支枕銷閑時炷香新晴故晚照芳草留斜陽

駸駸隨日老寧能問分陰波流固自遠雲在初無心鳥

聲驚幽思風徐快冲襟馬鄉苦病多中懷天莫忱

小隱世味薄花飛慘殘春明玉剝楚筍嫩紫庖吳蓴不
覺槃筋闕但喜志意新我惟一鄧足何必問大鈞

僕以義制心自謂頗忠赤保國不保身用忠豈用力所
以四將命悉能全趙壁未當引年歸痛定思政刺

雲山貯回腸日月任轉轂客居不問鄉一飽寧較粟家
釀報浮蟻溪鱗買尺玉以充朝莫槃懷抱無乃足

平日為飽役方拋世網嬰買魚沽市醞借姓過州城老

脫塵中境心游物外清寒溪行不盡端為濯衣纓

素懷統列岫乃家台山麓人境兩俱絕事物濟所欲芳
醪澈瓊白茗飲淪溪綠對客調玉軫清風入梧竹

春來每竊抃春去孰可嘖尋勝攬妍姿對花得清燕樽
酒所以樂摘植得忘倦忽改綠陰陰蒼苔從滿院

鑿池固不廣納納隘所居苟無水光寒便覺非吾廬漪
漣漾芳渚澄影浮晴虛樂哉濠梁心已復游嘉魚

道人范子珉隱跡朝市端筆墨作峯嶺氣象爭巔岼稍

變煙雲態便覺風雨寒鶴舉忽冲霄大羅得遐觀

范仙最所長畫牛誠絕筆圍模大小定毛孔不少失膊
腕與腹胯一牛動數日惟我頗得之卧起盡纖悉

寒毬格雖下春事亦可尋故園少見之花葉均來禽芳
蓓暖苞玉半腮紅淺深與客屢清賞只恐風雨侵

隨春動草木微和入池閣羣芳爭妍媼紅翠媚寥廓一
枝姑到眼萬態便如昨春深風雨來固已任開落

閑居必家釀不以空乏廢小槽壓春碧渾含揖和氣三

杯禦客寒一卮款僕意寧論有賢聖且復供村醉

小圃養春色乘時不可緩翌鋤常于于成趣湏旦旦花
摘去年種喜供一時翫舉杯付歌兒野服更蕭散

隨分作欄檻松竹帶花柳四時面面看百種日日有玩
目必羣卉洗心付芳酒吾儕不改常居間簡可久

老來叅同事勤志不敢失人言壚偃月吾意壚藏日朝
陽升西山異液甘若蜜一體奠所居旦旦享清逸

和靖骨已槁後來欲無說細雨斷魂句妙處益清絕竭

來客異縣籬落冷風月吟哦一字難愧此枝下雪

台山無牡丹單葉已最貴斗檻數花爾便欲發光氣珍
重莫肯折如天藏地祕西都每興懷此賞殆夢寐

春深多夜雨倦卧得飽聽穿林乍依微滴簷已紛競衾
寒似落莫人寂眷閑靜怡然遂高眠枕上頗適性

澤國經炎夏常厭日晷永既乏枕簟涼亦欠冰雪冷北
窓但倦卧閑人遠造請時濯醒心泉柳下汲深井

道人有相訪不求養生訣或問琴碁妙或笑汗漫說何

州有隱逸何山富薇蕨飯了且分携日課所不屑

吾年將八十歷踐何足數義不惜骸骨愧無罔君父挂
冠復挂冠求去再求去至願誠遂心燕笑樂畎畝

山高翳落日殘照欣晚晴意適策筇杖意倦眠桃笙雲
水喜益近語話能忘情書來故人意相憶應遑征

松隱靜無事松竹惟參差避熱卧其間綠蔭回涼吹水
雲不相遠起坐常自怡此心益浩然西風生桂枝

城居得高勝攔檻俯闌闔斂跡紅塵中游目雉堞外湖

光浸晴碧若與雲外會渙舟何處來幾點忽隱晦

葉落復葉落衝飈黯寥廓重疊響瑟縮翩翻下紛泊倦
客行脩塗幽人倚高閣歸來故山休冰霜欲蕭索

商飈忽在序候虫淒以鳴歲律念向晚崦嵫逼于征已
歎日月疾但覺鬚鬢擗搔首欲何為松篁助秋聲

秋暑正炎酷人不得以息向晚注大雨劇暑遂掃跡蕭
然物氣平暫止火御職上天常好生一涼誠大德

人生不如意十固常八九吾輩窮物理挺特惟所守東

風暖入律客意濃勝酒游鞍縱所如寧能困圭竇

雲山環所臨烟景日自異山作故人接雲為久處計酒
酣一聲笛梅風四山起清香賸披拂參橫伴村醉

我生苟無禍放懷在詩酒詩酒得自在功名亦何有正
欲醉墜車豈問柳生肘寫我平生適笑寄方外友

墜戶喜冬序秋容換霜風可數景物移只在笑談中菊
茂遠先見蓼疎寒更紅老懷欣自愜漸享受日功

四大一和合所以兆我命及其有損增遂復制我病五

年過縱心四大失正定新歲轉盼來疾應改新證
新年供家廟老稚晨少忙塊坐溫暖處但聞油醬香不
問物物闕有食時時嘗諸孫甚解事翁乃無飢腸

林泉久自得窓戶向深幽不復嫌村酒何能有客愁夕
陽烘遠水飛絮挾輕鷗杖屨歸從晚柴門月一鉤

中春艷堯李東風惠以繁胡為連日雪花葉飄闌干氣
非驕陽候宛若殘臘寒玄冥僭融和玉川知其端

二月
中旬

大雪

兩日

新春遨西湖結伴每有侶豈意氣差忒旬中自寒暑欣
欣一日晴愀愀三日雨謂言愛酒伴有酒誰能滑

門前露草嫩極目遨青龍策杖不知遠看山兼別峰曉
厨尋晚筍客供摘新菰舌下清肥足何勞細肋供

我有舊知識生來晦蹤跡邂逅不可見早夜何能覓忽
然積習處相逢吐胸臆臨了一句子會心極得力

斗水小漣漪拳石獻岩竇蒼蒼三峰足挺挺數葉秀
几得巨壑幽色清永晝以我兼忘心嵩華亦何有

秋雨濕庭戶陋舍集閑客重以樽酒空可為飢腸厄呼
籬取盃酌村香我先識一杯復一杯滿坐生春色

秋雨不可雷雷即雨無節況常收刈時只欲天明潔夫
何連日雨卧穗恐芽蘖已失早禾望晚田幸天輟

山色侵衣冷異氣作心賞嶺月聞鳳笙松風吹鶴氅碧
池縹澄綠羣山發清響以此助蕭閑欣然同擊壤

寂歷斜陽岸高低猶漲痕輕舟隨浪穩遠水帶烟昏野
色幾番換喬林何處村情懷了無事安得易銷魂

素願游羌廬夢寐不可易棄官竟一往不以歸意迫屢扣清虛仙杯酒詰疇昔永懷撥雲峯西塵每相憶

飯了縱閑適杖屨涉晴晝時物破百感環山獻明秀承宇茂芳桂追涼風細逗摘果靡憚勞聊用引稚幼

前日花正紅今旦香已改我知色空相未開固非在韶華每脩陳風雨不相貸任渠萬點飛豈待愁如海

吾家遠城市四圍縈疊嶂意尋烟霞游喜逐樵牧上松間憇兩足論高等四暢或時戴月歸山花記心想

雅意老山林每作山林趣引領山林景賦詠山林句嵐
光增日夕林風度朝暮時時携筇歸羣山送歸戶

松隱集卷二十二

欽定四庫全書

松隱集卷二十三

宋 曹勛 撰

書

上皇帝書十四事

草土臣曹某謹昧死再拜上書皇帝闕下臣聞負高世之慮者必有絕俗之言有尊主之功者必虞殞身之患何則言未出而見讒計已成而被戮自古然也故志存王室未伸所言恐懼於難者必每進而止踵將言而鉗

喙上負朝廷祿養之惠下乖見危致命之節此志士言
臣每歎息於斯乃推明哲保身之詩以自廣然果所謂
移孝為忠事君不二之臣竟未嘗以一死惑志鼎烹在
前卒鳴所言求聖君擇焉臣行年三十有六愚不練大
事獨知以孝移忠之義冀免尸位素餐之責故凡所臨
必以身殉九殞之虞常在所畧臣以為方今天下連兵
不休地不加復兵民膏原野聖主不奠居正良將死節
邊陲志士諫行言聽之時也豈可上貽六龍巡狩耶若

春夏之季少安行宮秋冬之交即脩車騎雖幸暫寧又
一日萬幾四海庶務可天下之奏躬乙夜之覽心委於
慮而身任其勞夫何使陛下憂勞若是臣每扼腕奮衣
而起求思知畧欲為陛下攘除宿憂稍奠帝枕况主憂
臣辱獨忍緘默不求試用耶臣謹有息民安民之策自
謂可以仰資聖化然語之至者不可載於奏牘事之秘
者不可泄於左右臣願賜清閒之燕望見清光俾口陳
其畧一不僥倖於寸進一不貪冒於賞典惟冀陛下知

有賤臣抱忠如此儻一語無効請就誅殛臣之幸也臣竊覽載籍封章亟上朝奏暮召者有之立談賜璧者有之以疇昔戰國猶取議論之臣若此方之今日豈不萬萬於彼哉臣故不敢隱忠避死思効愚計決意所言干犯通進惟陛下加惠特賜宣召

臣聞官者勵世磨鈍者也人者嚮德慕名者也官得其宜則事辦而功就人樂其事則加倍而邦寧故聖人觀向順宜因事制法所以勵人厚國也恭惟陛下建中興

之業必制中興之功然後驅一世之民而成興王之典
臣欲乞如古制為武功官賞十等惟寵戰功他賞不與
每授令繫于銜官同則以此高之密院別置籍記載其
名謂之入等入等則不次名用陞擢使令庶約功而得
死節草濫而收實才方時右武於是在焉或可施行乞
下臣具等格聞奏

臣竊以聖王御極揔覽人羣股肱之政不間親舊所以
開導聰明覺悟奸宄也周漢之法雖不可全用而加恩

戚屬俾典宿衛似猶勝四海之人且子母之性天道至親母以子貴自古皆爾陛下即位以來至親分離外戚杜隔使恩禮不能兼宣且漢室之制雖任英賢猶援姻戚親疎相錯杜塞間隙所以安宗廟重社稷宣德澤尊至親也今母后之族久廢不錄散在遐遠不得日望清光誠非慈愛承上之意况亂離日久人肆異謀威令不行叛逆僭號至或訛言儉行驚懼宿衛此誠可慮倘追名一二姻戚任以散官使奉朝請防未然之事察羣下

之端為陛下肘腋之親豈不恩禮兩全聖孝俱至哉伏望斷自聖心幸甚

臣恭惟二聖北狩屢易年所陛下孝思日甚一日冀在攘却強敵迎請以歸天未悔禍尚留羨里伏望明詔有司稽叅舊典將將來大禮加上二聖徽號不惟內伸陛下孝友之誠庶四海萬里益知聖意瞻懷之切

臣聞有大德者必靈瑞以符應撫大寶者必濟世而安民鮮有端居必先窮阨如周宣之伐玁狁如世祖之平

纂莽然後光濟四表奕世承休天下所歸天神所福雖
遭變不同而天之助順均也洪惟陛下以德承天為天
所子甚矣上帝之覆護于再于三昭陛下精意之虔扶
陛下神明之祚驗於天人之際煥若日月臣請縷陳其
目靖康之初金人犯順陛下亟臨敵寨人莫不畏天日
之威洵武之直氣懾羣敵因亦還轅此天之光啟者一
也比臣歸自敵中恭奉宣仁皇后訓詞曰陛下再出北
道欲就鞍時二后洎宮人送至廳事有幼女招兒者見

四金甲人狀貌雄偉或劔或戟擁衛聖躬女指示衆衆
皆不見然莫不畏肅后悟曰我事四聖甚謹果獲茲報
今雖在敵中益當不忘焚禮夜深必斗下四十拜此天
神陰相者二也恭聞初領元帥欲勒兵入援至相州睿
意有卜密射樓牌於字畫間三發三中及東渡大河冰
堅徹底渡騎未畢冰已漸流此天兆中興同符世祖者
三也靖康之末敵騎南渡時當艱危都下震動大臣喪
氣無策枝梧陛下以講好之職毅然就道繼京師失守

果協謳歌此天之昭答者四也維揚之役斥候不嚴賊棄輜重三路並進銳鋒已趨于揚子柄臣猶安於廊廟陛下御殿未畢亟叱六飛方渡江壩敵騎已及此天之保佑者五也逆黨滔天謀危宗社皇矣上帝臨下有赫大臣同德升日虞淵此天援明辟者六也方駐蹕會稽敵衆遽逼羣工惶惑未有施為欲以大兵嬰鋒則慮失機會勤討則謹重宜嚴宰相建利涉之言陛下亦從諫如響此天開聖德者七也惟上帝眷佑若此而陛下報

本已隆惕惕昭事可謂至矣伏望陛下憲天之度益度
天心鑒天命匪易之言為陛下力答之意臣恐朽質倏
先朝露則聖瑞未昭謹條奏以聞乞宣付史館

竊以古者寓兵於農以禦大敵兩漢而下無不皆然惟
魏及唐建府兵之制民兵遂廢唐全盛時戡大憝勦元
惡無非官軍者及德少衰據藩鎮起大盜亦無非官軍
者是以歷古有叛將而無叛兵由唐而下多叛兵而少
叛將理或致然今州縣之民百倍於兵力而義不能卻

內侮強不能禦外侵者豈非未嘗習用而墮其力哉竊見諸路州縣見行火甲以禦夜盜民安之若素習臣嘗推行脩見其便今欲乞就建民兵之法俾粗知部勒稍知戰事廂有坊坊有甲甲有伍伍有長許置器甲以肄武脩州委都監縣委令佐帶民兵將領專一習按復委太守提督之不期年一路便可得兵百萬實欲密制兵卒使不得逞而州郡內侮外侵遂無竊發倘或可採乞下某取索畫一便見不擾有利無害

竊以連年征伐畧無虛月凡功烈死事之輩泯沒無聞
致孝子孀婦無所旌顯昔太宗皇帝不忘勲臣猶次叙
其列得二百四家今建中興之功豈可不成一代之典
人死留名賢愚所共而聖王之祀臣有五義欲乞令所
在州縣有忠義報國當時功烈出衆所明知者許搢紳
之儒作為傳記經所屬投陳然後州府繳進宣付史館
並嚴戒所在常優給其子孫不惟仰照聖澤下漏幽冥
遂可激勸方今死節之士

竊見諸路州府管下廂軍數各不少不堪戰陣徒供送
迎然月給錢米與禁軍相等糜費軍期實為不急欲乞
權罷招填幾年竢平定之日依舊逐營闕額錢米仰令
項椿留委官主管以備別色支用

竊以朝廷加惠歸明官散在諸路以全懷來

闕

之恩

爵之祿之德亦至矣付以職任有親民者有監兵者上
下玩習皆謂遠人平日強暴桀驁之性尚存廢法自任
莫能訊治郡縣姑息率以成風此類豈可長也欲乞今

後凡所注授並作不釐務

竊見朝廷以連歲兵火財計匱耗用度既已不足而軍旅錢糧為先念不可誅求於民遂設鬻爵之法自承務郎修武郎以下入中之數有差然應募者終歲纔三兩人至改易度牒則靡然從命是皆喜於易應而樂於創建者竊原命婦冠帔之類似可如命宜等第自宜人以下三等優立入中之數許人承請俾為榮母榮婦之寵必見所至奔赴一如度牒便可施行

竊見建炎初置賞功司尋即廢罷恐當時主者兼用他屬之吏不得專掌致所行功賞因仍廢怠動經歲月致獻言者得以藉口遂成無用而類於他房竊原此司誠為今日之急蓋賞不踰時又曰賞必以信是烏可比他廢置哉意欲使掌有專官而亟行亦俾將士知功有專治而不雜信賞之政中興所先也欲乞復置賞功司專行戰陣功賞等事委能吏典治仍置簿月書已收行過某人功賞名件上司季攷其數或多至千百量與官吏

推恩以勸其職

竊以方今軍國之害所大者二一外侮二盜賊外侮則朝廷固已有處盜賊則尤不可忽嘗謂陳吳起秦赤眉起漢以至隋唐無不緣巨盜而隳國者此害豈不為今日之急哉竊原地日益曠盜日益衆湖廣之外鞠為戰墟大江東西屯為賊壤其衆熾盛動以萬計所向州郡莫敢枝梧雖不能鼓向朝廷而朝廷安得奠枕自微至著建賊范汝為可為深戒若漢武帝遣暴勝之衣繡持

斧逐捕長沙今而始知當時盡善古今雖異事勢則同
欲乞今後應干盜賊專責憲臣親臨督捕次責郡守摠
衆討蕩凡在界內不計大小須管撲滅況此兼節制管
內軍馬自可提兵護界臨時許以便宜如此則盜賊可
遏任內用殿最勅法以明功罪必見郡縣爭奮兼功自
厲矣賊息則民安民安則國定國定之後卻外侮而鄰
敵莫能窺其隙馴致之道在戒其初

竊以州郡之富全賴商賈其什一之稅則有益於公上

阜通之貨則惠養於民庶利固不一也方今駐蹕之所
宜招徠此徒少裨財用贍軍之費竊見廣泉二州市舶
司南商充牣每州一歲不下三五百萬計若今兩州除
紵麻吉貝等麗色物貨許依舊抽解外應細色權移就
臨安府抽解候事定日依舊庶得上供物貨既皆真的
又免起發腳夫之用是易十五之蠹耗為十全於行在
也加以四方商旅悉來奔湊則投回二稅並在城下茶
鹽鈔法當倍售於昔時舶船聞之亦必懽忻承命以就

利源比負擔竭蹶猶且趨嚮況許以全船竭貨而來哉
竊以廣南兩路自潮州而南居民鮮少山荒甚多前此
惟土人仰食故歲計租賦一皆贍足自中原兵火西北
工商士庶散處其地以鮮少之種供億兆之用又官司
科調四時有之以此民頗困乏欲乞將廣南兩路州縣
見今逐處荒廢田土括見頃畝丈尺召北客耕種量免
二三年官租委運司專一均撥授田務在隨宜就便庶
浮食流離之民有所依附而盜賊可以衰息且空居與

作役同當衣食苟為處畫則官私兩便

竊以帝王異尚損益隨時阨于艱危必奮獨見思所以
下採人事上禳天變以建大聖之本以通天理之明在
臣下宜悉所舉在朝廷宜博詢究以稱隨時之意臣不
知圖緯弗明天象徒以講讀故實記錄其語比聞祥符
中謝絳上疏言太祖皇帝生而包絡黃及受命五星聚
於奎而鎮星主之真宗升中泰山日抱黃珥含譽星見
其色皆黃土德之符也國家宜以土德王天下以繼聖

祖若漢以炎德紹堯後也臣誠知此非天下急務蓋念
前人一言之出誠發於中或獲半詞之獻死不可避萬
一得脩採擇少補國家則不猶愈於默默耶况前歲法
駕駐蹕會稽去歲臨安不旬日間三經回祿豈火失其
性而至於此倘因茲多故稽合天意以順土德不惟除
舊實新為禳卻之術而迎氣致祥亦不失五行傳德之
序

松隱集卷二十三